

VEDTEKTER FOR SKULEFRITIDSORDNINGA (SFO) I STORD KOMMUNE, jamfør opplæringslova § 13-7



Innhaldet i desse vedtektene vart endra av kommunestyret 24.09.2020.

Vedtektene gjeld frå 01.01.2021.

§ 1. FØREMÅL

Skulefritidsordning (SFO) er eit inkluderande omsorgs- og fritidstilbod for elevar på 1.-4. trinn i grunnskulen. I tillegg gjeld ordninga også for elevar med særskilte behov på 5.-7. trinn. Tilbodet vert gitt utanom den obligatoriske skuledagen.

Innhald og aktivitet skal utformast i samarbeid med barna og dei føresette og ha hovudvekt på leik, kultur- og fritidsaktivitetar med utgangspunkt i alder, funksjonsnivå og interesse hjå barna. SFO kan og ha ei læringsstøttande rolle. Barn med særskilte behov skal gjevast gode utviklingsvilkår.

§ 2. EIGARTILHØVE OG STYRE

Kommunen er eigar og ansvarleg for drifta ved dei kommunale SFO-ordningane.

Samarbeidsutvalet ved skulen (SU) er SFO sitt styre. SFO skal vera representert i SU med ein tilsettrepresentant og ein foreldrerepresentant. Dei har då møte-, tale- og stemmerett.

Det skal veljast minst ein foreldrekontakt mellom dei foreldra som har barn i skulefritidsordninga. Foreldrekontakten skal ivareta barna og foreldra sine interesser i SFO.

Alle føresette som har barn i SFO skal kallast inn til minst eitt foreldremøte i løpet av året.

§ 3. LEIING OG BEMANNING

Rektor har det administrative, faglege, pedagogiske og økonomiske ansvaret for SFO ved sin skule. Innanfor dei rammene som brukarbetalinga gir, kan rektor setja av ressursar til ein koordinator/leiar for SFO.

SFO-leiar deltek på samarbeidsmøte ved skulen i saker som gjeld SFO primært, og i saker som tilsette i SFO må kjenna til.

Rettleiande bemanningsfaktor er 15 barn per tilsett. SFO for funksjonshemma barn og/eller for barn med særlege behov kan ha høgare bemanningsfaktor.

Dei som skal arbeida i SFO må leggja fram politiattest.

§ 4. LEIKE- OG OPPHALDSAREAL

Dei kommunale SFO-ordningane disponerer ute- og inneareal som er eigna til føremålet ved den enkelte skule.

§ 5. OPNINGSTID

Kommunen har ordinært SFO-tilbud før og etter skuletid for 1.-4. trinn og for barn med særlege behov på 1.-7. trinn. Opningstida er kl. 6:45-16:15 (måndag-fredag). Tilbodet fylgjer skuleåret.

SFO-ordningane er stengde helge- og høgtidsdagar, samt jul- og nyttårsafta. Onsdag før Skjærtorsdag er SFO-ane opne til kl. 12:00.

Når tilsette i SFO deltek på skulen sine planleggingsdagar, er SFO-ordningane stengde.

I tillegg til ordinært SFO-tilbud gir kommunen tilbod om SFO på undervisningsfrie dagar. Oversyn over undervisningsfrie dagar finn ein i skuleruta. Sommar-SFO er eit tilbod frå skulen sluttar i juni og til skulen byrjar att i august. Desse tilboda gjeld for eitt skuleår om gongen, og er samlokalisert på ein av barneskulane i kommunen.

§ 6. OPPTAK

Rektor har mynde til å fatta vedtak om opptak i ordinær SFO ved sin skule og til SFO på undervisningsfrie dagar og sommar-SFO. Den kommunale klagenemnda er klageinstans.

Føresette søker om ordinært SFO-tilbod på skulen der barnet deira er skrive inn. Ein søker på våren og har SFO-plassen til den vert sagt opp, jamfør § 7 om skriftleg oppseiing av plass. Det er ikkje nødvendig å søka på nytt om ein skal fortsetja til hausten. Søknadsskjemaet er elektronisk og ligg på kommunen si nettside. Førsette til elevar med særlege behov på 5.-7. trinn brukar og dette søknadsskjemaet.

Kommunen har eit hovudopptak til ordinært SFO-tilbod med søknadsfrist 1. april, og deretter opptak ved ledige plassar.

Prioritet ved opptak

1. Elevar på 1. og 2. trinn
2. Elevar med særskilte behov
3. Elevar på 3. og 4. trinn

Føresette kan i tillegg søkja om SFO på undervisningsfrie dagar og sommar-SFO. Det er eige søknadsskjema for dette på kommunen si heimeside. Søknadsfristen er 1. april.

§ 7. ENDRING OG OPPSEIING AV SFO-PLASS

I skuleåret gjeld ein gjensidig oppseiingsfrist på to månader frå den 1. i påfølgjande månad. Oppseiing og endring av SFO-tilbodet skal vera skriftleg. Det må betalast for heile oppseiingstida, og for unytta plass. Dette gjeld og for plass i SFO på undervisningsfrie dagar og/eller på sommar-SFO.

Føresette kan søkja om sommar-SFO og SFO på undervisningsfrie dagar. Søknadsfristen er 1. april. Tilbodet om sommar-SFO og/eller SFO på undervisningsfrie dagar vert gitt for eitt skuleår ved ein av barneskulane i kommunen.

§ 8. FERIE

Barna skal ha minst fire veker ferie i løpet av eit skuleår. Tre av vekene skal vera samanhengande og avviklast innanfor tidsrommet som skulen er sommarstengd.

§ 9. FORELDREBETALING

Kommunestyret fastset årleg satsar for foreldrebetaling for plass i SFO*. Betaling for mat kjem i tillegg. Kvar SFO fastset sjølv satsar for matpengar i forhold til sjølvkost. Det er høve til å ta ekstra betaling til turar og utflukter.

Det skal betalast for ordinær SFO i 10 månadar. Juli er betalingsfri, og ein betalar for halve juni og halve august.

Kommunen kan belasta fakturagebyr for å dekkja administrasjonskostnad til utsending av papirfaktura. For å unngå dette må føresette oppretta e-faktura.

For sein betaling vil føra til morarente.

Ved vesentleg misleghald, dvs. etter tre månadar manglande betaling, skal føresette få tilbod om betalingsavtale. Om ein ikkje vert einig om betalingsavtale, vil uteståande beløp verta kravd i samsvar med gjeldande lovverk.

Hushald med låg inntekt og elevar som går på 1. og 2. trinn kan søkja om inntektsgradert foreldrebetaling for SFO. Ordninga skal sikra at ingen hushald betalar meir enn 6 % av samla inntekt for ein plass. Det vert fastsett kvart år kva som vert rekna som låg inntekt og som då gjev grunnlag for inntektsgradert foreldrebetaling.

Elevar med særlege behov har gratis SFO på 5.-7.trinn.

Ordinært tilbod og satsar

	<i>Tilbod i prosent</i>	<i>*Satsar per månad 2021</i>
Fem dagar i veka kl. 6:45 - kl. 16:15	100 %	<i>Kr. 3 519</i>
Fem dagar i veka frå skuleslutt til kl. 16:15	80 %	<i>Kr. 2 908</i>
Fire dagar i veka kl. 6:45 - kl. 16:15	80 %	<i>Kr. 2 908</i>
Fire dagar i veka frå skuleslutt til kl. 16:15	60 %	<i>Kr. 2 211</i>
Fem dagar i veka kl. 6:45 til skulestart	50 %	<i>Kr. 1 906</i>
Turnus: To heile veker kvar månad kl. 6:45 - kl. 16:15	50 %	<i>Kr. 1 906</i>

SFO på undervisningsfrie dagar, sommar-SFO og satsar

	<i>*Satsar 2021</i>
SFO på undervisningsfrie dagar	<i>Kr. 3 996</i>
Sommar-SFO i juni	<i>Kr. 1 644</i>
Sommar-SFO i august	<i>Kr. 2 469</i>

**kommunestyret har i samband med budsjettvedtak for 2021 innført søskenmoderasjon i SFO frå og med 2021. For å få rett til søskenmoderasjon må, søsken bu i same hushald. Søskenmoderasjon vert rekna ut etter kva plasstype det enkelte barn har. Han vert berekna slik:*

For første barn må du betala vanleg pris

For barn nummer to får du 30 prosent søskenmoderasjon

For barn nummer tre og oppover får du 50 prosent søskenmoderasjon

Merk at du ikkje treng søkja om søskenmoderasjon. Han vert berekna automatisk.

§ 10. ENDRING I VEDTEKTENE

Det er kommunestyret som godkjenner/endrar vedtektene til skulefritidsordninga i Stord kommune.